

# BOLUNTAT DI DIOS

## Lès 3

Kiko ta un bida eksitoso? Un predikador famoso a deklarà ku un persona eksitoso ta un persona ku ta haña sa kiko Dios ke p'è hasi ku su bida anto ta hasié. E tin rason. Popularidat, influensia, rikesa, i poder no ta e midí bèrdadero di eksito.

Meta di e lès aki ta pa yudábo kompéndé kiko Dios ke pa bo hasi—esta boluntad di Dios—pa bo por hasi e kosnan ku E ke pa bo hasi. Nota tres aspekto di Dios Su boluntad.

### DIOS SU BOLUNTAT PERMISIBEL

Dios tin kontrol di tur loke ta sosodé den mundu. Esei no ke men ku Dios ta pone tur kos sosodé—asta kos malu. Ma tin bes Dios ta **pèrmití** kos sosodé ku E no ta aprobá pa E por logra un meta superior.

Por ehèmpel, pruebanan ta produsí \_\_\_\_\_ segun Santiago 1:3. Dios por pèrmití pa bo pasa den skual pa hasíbo mas fuerte spiritualmente.

Segun Romanonan 8:28, "...Dios ta hasi \_\_\_\_\_ obra huntu pa \_\_\_\_\_ pa esnan ku ta stima Dios..." Di un òf otro manera, Dios por hasi asta e kos mas malu den bida bira un bendishon pa bo.

Dios a krea hende di tal forma ku nan tin nan mes boluntad. Dios no ta obligá ningun hende kontrario di su boluntad. Dios ta duna hende e libertat pa skohe pa hasi loke Dios ke, òf hasi loke nan mes ke. Ma hende tin ku karga e konsekuensia di nan desishon.

### DIOS SU BOLUNTAT GENERAL

Palabra di Dios ta indiká bon kla ku E ta deseá siertu kos di tur persona ku ta konfia Kristo pa salbashon. Loke E ta deseá ta klaramente Su boluntad. Den e siguiente espasionan, skirbi kiko ta boluntad di Dios segun e teksto.

1. 1 Tesalonisensenan 4:3 \_\_\_\_\_

---

2. 1 Tesalonisensenan 5:18 \_\_\_\_\_

---

3. 1 Pedro 2:13-15 \_\_\_\_\_

---

4. 2 Pedro 3:9 \_\_\_\_\_

---

5. Segun Romanonan 12:1-2, kiko bo mester hasi pa komprobá kiko ta e boluntad di Dios?

---



---



---

Dios ya kaba a laga sa ku e kosnan aki ta Su boluntad pa tur hende. Komo resultado, no tin nodi pa pidi Dios por ehèmpel pa E indiká kiko ta Su boluntad tokante relashon seksual fuera di matrimonio. Ya kaba El a bisa bon kla ku esei no ta Su boluntad.

### **DIOS SU BOLUNTAD PERSONAL**

Tin ora bo tin ku hasi un desishon. (Ku ken lo mi kasa? Mi mester sigui mi estudio? Mi mester buska un otro trabou? Ets.) Bo ke hasi e desishon korekto. Bo ta deseá pa sa kiko Dios ke pa bo hasi. Ma Dios no ta laga un papel kai fo'i shelu ku instrukshon spesífiko kiko bo mester hasi. Kon bo por sa kiko Dios ke?

Hopi hende ta bai tras di nan propio sintimentu, impreshonnan, soñonan, èts. keriendo ku esei ta indiká e boluntad di Dios.

Esakinan ta hopi peligroso. Bo sintimentu ta afektá dor di loke bo ta deseá, loke ta sosodé den bo bida, i asta kuantu bo a drumi ayera nochi. Hopi hende a yega di hasi un desishon desastroso a base di esei, keriendo ku tabata stèm di Dios. Satanas por presentá komo un “angel di lus” (2 Korintionan 11:14). Esei ta nifiká ku e ta falsifiká stèm di Dios. Sea kouteloso pa sigui un impreshon sin analis’ é bon.

Dios **ke** guiábo. Ma e problema mayó pa sa Dios Su boluntad, ta ku bo tin ku pone bo propio boluntad un banda. Hopi biaha nos aktitut ta, “Dios, mustrámi kiko Bo ke pa mi hasi...ma sòru ku e ta plan A.” Kisas Dios ke pa bo hasi plan A. Ma bo mester ta despuesto pa hasi Su boluntad asta si ta plan B, C, òf Z promé ku E lo indiká kiko E ke pa bo hasi. Una bes bo a pone bo propio boluntad un banda, Dios por guiábo.

Kon Dios lo indiká Su boluntad na bo? Lesa e siguiente tekstonan anto skirbi e pasonan ku bo mester tene kuenta kun’ é pa haña Su guiansa.

1. Salmo 119:105 \_\_\_\_\_  
 Studia loke Beibel ta bisa tokante e desishon ku bo tin ku hasi. Dios **nunka** lo indiká pa bo hasi algu ku ta kontradisí Skritura.
  
2. Mateo 7:7 \_\_\_\_\_  
 Papia ku Dios tokante e desishon ku bo tin ku hasi. PidiE pa E revelá Su boluntad na bo.  
 Un aviso: No asumí ku tur impreshon òf idea ku bo ta haña miéntras bo ta hasi orashon ta bin di Dios i pues ta Dios Su boluntad. Tòg mester evaluá bon kada idea a base di e otro pasonan ku bo tin ku tuma.
  
3. Proverbionan 12:15 \_\_\_\_\_  
 E siguiente personanan por skapábo di hopi problema dor di yudábo evitá erornan komún. Skucha nan.
  - a. Mayornan
  - b. Lídernan spiritual
  - c. Kristiannan spiritualmente maduro

d. Esnan ku ya kaba a yega di hasi un desishon similar

4. 2 Korintionan 2:12 \_\_\_\_\_  
 Sirkunstansianan di bida por indiká loke Dios ke pa bo hasi, p.e. famia, kompromisonan, finansa, salú, edukashon, èts. Tin ora ta komo sifuera Dios ta habri òf sera un porta ora bo ke bai den siertu direkshon. Tin ora ta komo sifuera tur porta ta será. Esei **por** indiká ku Dios ke pa bo bai den un otro direkshon. Si bo ke sa kiko Dios ke pa bo hasi, bo tin ku hasi un bon analisis di bo sirkunstansianan.

Tin ora bo por kansa di warda pa Dios indiká Su boluntad. No laga esei bira okashon ku bo ta hasi un desishon deskabayá. Si te ainda bo ta duda kiko ta Dios Su boluntad pa bo, posponé hasi e desishon asina tantu tempu ku bo por i sigui konsentrá riba pasonan 1 te 4.

Si ta yega tempu ku bo mester hasi e desishon—i bo a kumpli fiel ku pasonan 1 te 4—hasi e desishon ku bo ta kere Dios ta deseá konfiando ku E ta guiábo.

### **TAREA PA KAS**

1. Siña Romanonan 8:28 fo'i kabes.
2. Konta un persona kiko Kristo a hasi pa bo.
3. Sigui fiel ku bo tempu ku Dios—sikiera 15 minüt—tur dia.
4. Lesa e siguiente lès i yena e kontestanan.